

يعم جابر وصل ظعن السبايا  
رجعنا الكربلا وادي المنايا

نزور الحبيب أبويه الغريب فجعنا البين

\*\*\*\*

أنين الروح	على المذبح	وجع بالخاطر المكسور
غضى ضامي	جسد دامي	أبويه بالترب مغفور
يظل مطروح	وكأله جروح	وظفله عالصدر منحور
وراسه انشال	على العسال	فجيعة حلت ابعاشور

نعوفه امكسره اضلاعه على التربان  
بدن متبضعه اوصله بغي عريان

نبيح العدا سائب الردا فجعنا البين

\*\*\*\*

بويه حسين	بلييه معين	يصد للعليه والعسكر
ينادي عون	حبيب وجون	زهير اعله الثرى مطبر
يقاسم صاح	لعابس ناح	ينخي صحبه بو الأكبر
مرد چبدي	انا اشبيدي	اعلى حيرة بويه ما أكر

أبويه ابكربلا وحده بغي مختار  
يحشم جملة انصاره على الأوعار

جثت بالصعيد وماله عضيد فجعنا البين

\*\*\*\*

أنا اتحسّر	على الأكبر	عليه امصابه يتجدد
كسر ظهري	خلص صبري	على طوله انا اممّدد
أشتم نحره	واحب صدره	نبي الله لي اتجسد
صفغت الراح	لخويه الراح	أجود بنفسي وتشهد

شبكة اعليه بالعشره يزيد اچاي  
شعب گلبي بالحسره يفت احشاي

يخويه علي علي يا علي فجعنا البين

\*\*\*\*

يعم جابر	عجب صابر	متدري بالجري والصار
عطش وايتام	نهب لخيام	وبينه حقت الأخطار
بظلام الليل	إجتنه الخيل	أوجت بالصدر چم نار
حرم واطفال	بچا اولوال	علينا اتكالبت لشرار

تفرّ ابدشه مفزوعه وسط هالخييل  
نسانا بلاستر هامت تبث الويل

عدو مارحم سلب هالحرم فجعنا البين

\*\*\*\*

نحل جسمي	البطل مرمي	أشوف الجسمه امگطع
بلييا ازنود	اويمه الجود	ومايه عالثرى اموزع
اوله زينب	لفت تنحب	تموت ابلاحظه المصرع
بالمها تجول	حزنها ايطول	كلبها ابكربلا اتروّع

على الهزل يركبوها بلا كافل  
تمر بالشاطي وتعاين أبو فاضل

جسمه صريع راسه كطيع فجعنا البين

\*\*\*\*